

von Wulf Wager

## Gyros mit Spätzla goht net



Normalerweis äüßre i mi zu weltpolitische Thema net, aber des Thema Griechaland goht mr langsam aber sicher uf da Sack. Des mit Europa isch vom Grundgedanka scho recht, aber was die Gründungsväddr seinerzeit oifach net bedacht hend, send dia Menscha. Ond dia send halt ondrschiedlich. A Mitteldäne tickt anderschr als a Südumäne ond an Ostportugiese nomol ganz andersch als an Nordengländer. Do geit's Mentalitätsondrschied, die so

groß sind wie schwarz ond weiß oder Tag ond Nacht. Deutsche Maßstäb ka mr halt net an griechische Verhältnis anlega. Des isch des oine. Des andere isch, dass mr denne Griecha halt oifach saga muass, dass wenn se 's so han wellat wie mir, sie oifach schaffa ond vor allem Steura zahla missat, so wie mir au. D' Hälfte hot in dr Vrgangaheit koine Steure zahlt - vor allem die Reiche. 's ka jo net sei, dass des griechische Volk drüber abstimmt, ob se Schulda zrückzahla wellat oder net. Selber kaum Steura zahla, aber no wella, dass mir mit onsrer Steuergelder da Kopf für die jahrzehntelange politische Misswirtschaft, egal von welcher Regierung, nahalta missat. Des goht net! Die Linke Spaßbuaba send für Vrsprechonga gwählt worde, dia koi Mensch halta ka. Do sott onser Regierung mol des deutsche Volk froga, ob se de Griecha no meh Geld gebat, mit dr Aussicht, dass se en a paar Jahr – dann ondr ra andera Regierung – wieder sagat, dass se en Schuldaschnitt wellat.

Mei Nochbere – sie wissat ja, des propere 150-Kilo-Prachtweib – isch letscht Woch' uf d' Sparkass ond hot zu ihrem beanzugta Berater gsait, dass sie jetzt en Schuldaschnitt han will ond außerdem dät se nomol en Kredit braucha, damit se ihr Darlehen für's Haus bediena ka. Der hot grauße Auga gmacht ond an Lach- ond no en Schwitza'fall kriegt, isch kollabiert ond mit ma Herzanfall en's Krankahaus eigiefert worda. Mei Nochbere war sich aber koiner Schuld bewusst... so wie die Griecha.

Bis näggschd Woch'  
Ihr

Alle Kolumna zom Nochlesa  
ondr [www.woascht.de](http://www.woascht.de)